



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

tiryimyim@aolima

tir yimyim

TAPAK 7

Kim Jong Un-i 'model' yimti semdang

Mopung menenba atema aluyimer dak matongtsüla: Rakesh Tikait



VOL. XIX NO. 40 (ADOK 40)

DIMAPUR

RASEMNÜ (WEDNESDAY)

YIMPOKSÜI (NOVEMBER) 17, 2021

₹ 5.00

Nov 2021 nungie e-Pay Bill System ajangaitasen agütsütsü

Dimapur, November 16, 2021 (TYO): Nagaland nung aliba department ajak nung mapa inyaktertem osang bendenogo aser tangnungi e-Pay Bill System ajanga itasen aser tanga sen ajak agütsütsü ta Finance Department-i metetdaksü.

Personal Information Management System (PIMS) Cell, Personnel and Administrative Reforms (P&AR) Department ajanga Department ajak nung osang benden.

November 2021 nung tenzüka sorkar mapa inyaktertem nem e-pay Bill ajanga sen agütsütsü. Iba ya P&AR Department-i September 27, 2019 nü sangdong agütsüba ama PIMS database nung tenüng register asüba sorkar mapa inyaktertem asoshi lir, ta Finance Department-i metetdaksü.

PIMS database ya 2016 nung renemtsü tenzüka aser iba nung department ajaki molunga yaritepogo. Maneni, e-Pay Bill System atema DDOs aser Bill Assistants nem training tem agütsüogo.

Anungji e-Pay Bill System ajanga sorkar mapa inyaker nem sen agütsüba nung tetsükdaksü kecha malitsü imlar aser ajaki iba mapa takok angutsü atema yarietpsü metetdaksür, ta Finance Department-isa ashi.

Iba mapa inyaktertem timtem kar danga ajurura PIMS Cell, P&AR aser Finance department nem osang sangokjang ta parnokisa metetdaksü.

Department ajaki P&AR Department ajanga latetja aliba tetuyuba aser inyakyim sülen anidaksü metetdaksür, ta Finance Department-isa ashi.

ANCSU-i Principal aser Lecturers meshir

Dimapur, November 16, 2021 (TYO): Mongulbarnü All Nagaland College Students' Union (ANCSU)-i Commissioner Secretary, Higher & Technical Education dang principal aser lecturer maliba indang khuret lemsatepba den takhangba agütsüogo.

Fazl Ali College aser Mount Tiya College nung ita aika Principal mali ketdangsüa arur

aser iba ajanga college nung mepetmesü ajurutsü. Anungji tangsa college ana nung Principal shimtsüla, ta ANCSU-i ashi.

Sorkar college aika nung department shia lecture peria mali arur. Anungji UGC guidelines sülen anidaka Asst. Professors aser Assoc. Professors shimtsü mepishir, ta Tir Toito D Chishi aser Tongti Tezulur Tenyesinlo Bukh nati shidi nung ashi.

CNCCI-i SARFAESI Act atema state sorkar dang pelar

Dimapur, November 16, 2021 (TYO): Nagaland sorkari winter assembly session nung SARFAESI Act benoktsü molunga agizükba atema pelar ta Confederation Of Nagaland Chambers Of Commerce And Industry (CNCCI)-i metetdaksüogo.

"CNCCI-i taoba küm asem tsüingda Nagaland Chief Minister aser Chief Secretary na dangi SARFAESI Act benoktsü atema shidi aiben zülüogo aser September 16, 2021 nü One Day Nagaland Business Shutter down agia liasü. Iba sülen District 12 nung Chamber of Commerce and Industry temia Chief Secretary dangi shidi zülü. Iba dak sendakba nung Chief Minister Neiphiu Rio-i aniba Select Committee ajanga yimjak nung sangdong ka agütsü aser taruba assembly session nung SARFAESI Act benoktsü nangzük" ta Chairman Dr. Khokugha Muru aser General Secretary Dr. Seyievilie Mor nati ashi.

"Nagaland nung küm 20 shi ka SARFAESI Act mebenoki lia aruogo. Nagaland nung MLA aser political party ajaki iba Act benoktsü molunga agizüktsü mepishir kechiyong iba ajanga Naga entrepreneurs,

shishilebartem aser state indang rongsenketzung nung temelenshi tajung bentsür arutsü" ta CNCCI-i ashi.

Nagaland Bar Association ajanga o toktep ayongzüka agiba nung ashiba tebilembatem akhümtsübur. Lisopurtem aliba Meghalaya state ama nunga sobaliba aser ali kibur inyakyim den liromedema iba Act amshir. Anungji Nagaland nunga iba Act benoka tenzüksü mepishir, ta parnokisa metetdaksü.

CNCCI-i NLA Select Committee Chairman aser CM Neiphiu Rio aser Planning and Coordination, Land revenue and parliamentary affairs Minister Neiba Kronu nati mezüng anogo nung tenzüker kanga dang jangrabangra yaritepa aruba atema pelar.

Maneni PWD (Housing & Mechanical) Minister Tongpang Ozukum, TR Zeliang, Imkong Imchen, Chief Secretary aser committee nung züngsemtemi Naga nung khuret angateteba atema pelaba shisemer.

NLA select committee-i latetba agizükba atema CNCCI-isa Bankers Union of Nagaland dang pelaba metetdaksü, ta Dr. Khokugha Muru aser Dr. Seyievilie Mor nati sangdong nung ashi.

Nübertem indang khuret aser tebilemstütem asoshi inyakang: Dr. SC Jamir



November 16, 2021 nü Dimapur Press Club (DPC)-i ayongzüka National Press Day sentong nung Padma Bhushan, Dr. SC Jamir-i o jembidang agiba noksa angur.

Dimapur, November 16, 2021 (TYO): Osangkaket aser osang zülurtemi yimten yimsüsürtemi jembiba onük masü saka nübor indang khuret aser tebilemstütem nung temolung agütsütsüla, ta tanü Padma Bhushan Dr. SC Jamir-i tayongzüka agütsü.

India nung küm shia November 16, 2021 nü National Press Day amonger aser Dimapur Press Club (DPC)-i tanü iba anogomung tenüng nung sentong tajung ka ayongzüka agiogo.

Tanü DBDIL Hall, Don Bosco

School Campus, Dimapur nung DPC-i "Who is not afraid of Media" omen nung ajemdaker National Press Day among aser Padma Bhushan, Dr. SC Jamir-i tetushi tejaoker ka ama shilem agi.

"Alima kanga kara ainer aser talisa ibaji science aser technology wadang kanga renloka aoe. Tanü asen loktiliba ya 'information society' ka kümogo aser senso shiai alima indang osang tasen angashitsü janrar. Iba ama mapang ka nung osang ajunga, shitak aser tim sangoktsütsü nüngdaker" ta Dr.

SC Jamir-i ashi.

"Tanü Right To Information kanga tongtipang kümogo saka kasa mapang nung asenoki India indang Constitution nung temeten agüja alibatam mamatsüla" ta paisa ashi.

"Sorkar aser Press tsüingda tesentaktep alitsüba nung tongtipang saka osangkakettem aser tazüngertem tsüingda tesentaktepji tongtipangba lir. Anungji osangkakettemi yimten yimsüsürtem indang onük masü saka nübor indang khuret aser tebilemstütem nung temolung agütsütsüla" ta Dr. SC Jamir-i ayongzüka.

"Nübertemi media tsübuttsü masü saka saputsüsa osangbener aser zülurtemi inyaksüla" ta paisa ashi.

Nagaland nung alirtem terata mapang ka nung alir, kechiyong telok shingaia parnok koloni aoe'ar tejangja meshiteter. Asenoki Putu 21 buba indang jembir saka Naga nungeri tesüba nungi mepilateter aser iba jagi putiotsü tasen meyangluteter. Asenoki tesüba indang dang bilema jembiba ajanga alima den liromedema tejakleni maoe" ta paisa tebilemdangtsü olen ka lemsatep.

(Maneni tapak 2 nung...)

Prof. Jagdish Mukhi-i Lumami nung NU Headquarters semdang

Dimapur, November 16, 2021 (TYO): Assam aser Nagaland Governor aser Nagaland University Chief Rector, Prof. Jagdish Mukhi-i November 16, 2021 nü Lumami nung Nagaland University Headquarters semdangogo.

"Nagaland University ya 1994 küm tenzüka aser iba sülen nungi kanga renlokogo. Loktiliba nung nüngdakattem anepalutsü atema NU-i lanurtem ayongzüker aser tashi ita aniteter" ta Governor Prof. Mukhi-i ashi.

"NU ajanga quality education agütsür aser iba ajanga Nagaland nung lanurtem aniteter. NU-i kaketshirtem dang ochishiba, ajemaluba, meranga inyakba, bendanga agütsüba, temeim, aria bilema aser külem ta asüba tesayubatem agütsür" ta pai metetdaksü.

"North East aser Nagaland nung aliba arem-mintem ajanga alimai net zero alizüng ayuba

atongtsü nung aser fossil fuel amshiba ajemba nung teyari agütsütsü" ta Prof. Mukhi-isa ashi.

"Arem-min ajanga oxygen agütsür aser iba ya COVID-19 wara tanabuba mapang kanga nüngdaka aküm. Nagaland University-i tanü aser asüng atema tzü-mopung kümzüka aser wazüka ayutsü asoshi mapa inyaka aotsüla. Campus shia model village ama yim pungugu adopt asütsüla" ta paisa ashi.

"National Education Policy, 2020 ya nübertemi taginüba nung ajemdaker yangluba lir. Shishahirtem aser mapa agütsürtem adokdaksütsü atema iba policy yanglu. Anungji NU-ia taruba academic session nungi NEP 2020 tenzüksü imlar. Iba atema skill sentongtem agütsüla" ta paisa shisem.

Prof. Jagdish Mukhi-isa temang anema ayutsüba indang olen ka ashidang kaketshirtemi games & exercises nung shilem

agütsü atema University-i sentongtem tenzüksü ayogzüka.

"University indang alizüng tongtipangji kaketshirtem nüngdak peritsütsü atema lir. Iba atema university nung department ajak nung temolung agütsür" ta Nagaland University, Vice Chancellor, Prof. Pardesi Lal-i ashi.

"Loktiliba ka nung tetsürtemi higher education azüngbaji tajung tangatetba aliba loktiliba ka ta züngshir süra, Nagaland University nung tetsür kaketshir 62% lir aser iba ajanga lenmang shitak jajaba loktiliba ka sayur" ta Prof. Pardesi Lal-isa metetdaksü.

Tanü Governor Prof. Jagdish Mukhi den pa kinungtsü Prem Mukhi, Commissioner & Secretary to Governor, T. Mhabemo Yanthan, IAS; Additional Secretary, George Abraham aser tanga ketdangsurtem aru.

COVID-19 Nagaland: 4 dak putet, 16 taneptsü angu & 1 asü

Kohima, November 15, 2021 (TYO): Nagaland nung Mongulbarnü nisung 4 dak COVID-19 putet, 16 taneptsü angu aser 1 asü.

"Tanü Dimapur nung nisung 4 dak putet. Taoba ghonda 24 tsüingda COVID-19 puteta alir nisung 16 taneptsü angu. Parnokji Dimapur nung nisung 6, Kohima o Mokokchung nung pezüzü (4) aser Phek nung 2 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Nisung 32,018 rongnungi

30,129 taneptsü nguogo aser ibaji taneptsü angur 94.08% lir, ta paisa ashi.

Tang nisung 149 anepaludar saka parnok 119 dakbo shirangba yimya kecha mali, ta Dr. Kikon-isa ashi.

Mongulbarnü Zunheboto nung COVI-19 puteta alir ka asü aser iba nisung züngsema tasür ajak agi 695 kümogo, ta paisa shisem.

"Hombor tashi nung nisung 719,344 nem COVID-19 vaccine indang dose 12,41,133 agütsüogo" ta State

Immunization Officer, Dr Ritu Thurr-ia metetdaksü.

"Vaccine agirtemji frontline workers 60,975, healthcare workers 15,999, arishi küm 45 ser temapur 204,127 aser arishi küm 18 nungi 44 tsüingda alir 438,243 lir" ta pai ashi.

"Tang tashi nung nisung 521,789-i dose anaprong agiogo. Parnokji frontline workers 48,182, healthcare workers 13,462, arishi küm 45 ser temapur 167,200 aser arishi küm 18 nungi 44 tsüingda alir 292,945 lir" ta Dr Thurr-isa ashi.

Kohima aser Mokokchung nung National Press Day mungogo



DIPR conference hall, Kohima nung November 16, 2021 nü State level National Press Day munga liasü, kong Advisor to Chief Minister, Abu Metha tongti tesemdang ka ama dena liasü.

Dimapur, Yimpoksüi/Nov. 16 (TYO): State level National Press Day, 2021 ya DIPR conference hall, Kohima nung November 16, 2021 nü "Who is not afraid of media" omen nung ajemdaker munga liasü, kong Advisor to Chief Minister, Abu Metha ya tesemdang tongti ka ama dena liasü.

Pai iba sentong nung jembiba mapang, DIPR dang ya sorkar indang olulu prokba gol ka ta ja liasü saka mapang melenshia aiba ama tangatetba melenshiogo, ta ashi.

State sorkari takok anguba metetdaksütsü asoshi IPR mapa lir. Anungji tejen tangatetba aser mapa yutsür Nagaland asoshi otsü tasen atema shilem tajung agütsüla, ta Advisor Abu Metha-i ashi.

Department of IPR nung tetemsü lenir aika lir aser yamaji state sorkar, sentong balala yanglur aser item sentong mapa kuma inyaker temi department dak tali rangloksüla, ta pai ashi.

Internet aruba sülen aser social media poktetba sülen ase ano media sapang balala aser social media sapang balala nung onük aika nung o intepba tsütsü department-i temolung agütsütsü nüngdaker.

Sentong yanglurtemi putu tasen indang yimya-liru angatetsüla aser IPR department atema sorkari shilem aser sentong tasen yanglutsütsüla, ta ashi.

Metha-i department aser media house tem dang timtem balala ajuruaka state nung takok

anguba otsü tem nüburtem nem metetdaksütsüla, kechiaser yamala otsü yagi nübur ajungmesor, ta Metha-i ashi.

Pai ashiba agi, Nagaland nung aliba media house aser dangalen aliba media house medemdangra tetsüngda tulu lir, anungji sorkar aser Naga nung lungjemer parnok temaba jenjangi ajungkettsüla aser tashi agütsütsüla.

Pai Nagaland nung aliba osangbener dang ochi nung nokdaksü aser ochi atema tsübua malitsü ayongzüka liasü. Nagaland nung inyakyim melentsüsa süra, loktiliba nungi tamajung indoktsüsa süra, media ajanga asüngdangtsü molunga alitsüla aser ochi ashitsüla aser sorkar metokmeperi tuteta ashitsü molungsentsü alitsüla, ta pai ashi.

Yamaji inyaknung dang media ya democracy indang dang tongshi tem den nokdaksü aser ibaji ajanga dang shiba media tsübua mali ta asüngdangtetsü. Saka item nükjidong tongtetsü asoshi timtem jenti ajurutsü, ta Metha-i ashi.

Tongshi pezübuba ta kisung jembiba ya teperi masü, saka democracy indang tongshi pezübuba renloksü asoshi tetsüng-tepen tali bulutsüla.

Paisa press aser media house tem dang bushisüngdanga osangbenba nung tali temolung agütsütsü ajungshia liasü.

Investigative journalism atema media house aser lokti teyari nüngdaker, aser rongsen

alitsüla, kechiaser investigative journalism ya balaka lir, kong tasüngdanga balala asüngdang, nüburtem sadoksayima meyutsür aser yangji tongshi pezübuba adoker.

Oosangbener ya danga tongshi asem anüker ama alitsüla aser nübur ola ama inyatsüla aser Naga nung tangatetba melenshiba nung yaritsüla, ta Advisor-i ashi.

Osang abentsü temeden melira, ajak abensa osang abenba melira democracy malir, ta pai ashi.

Director, IPR, Er. Z. Tokishe Sema-i iba sentong nung tajungshi o jembiba mapang, Press Council of India nem akhum agüja National Press Day ya amunger, koba linük nung tetsükdaksü mesüra timtem maliba osangbener anüker ka ama inyaker, ta ashi.

Pai osangbener dang lokti ajungtsü asoshi inyaksü aser ano state aser linük ajungketba nung yaritsü ayongzüka liasü. Iba sentong nung Deputy Director, IPR, Simon Telia menden liasü.

Mokokchung Press Club puri Hotel Metsüben nung Mongulbarnü National Press Day munga liasü, kong Ao Milen yimozülur, Akangnungsang Jamir tesemdang tongti ka ama shilem agia liasü.

Sentong tatsüka agiba mapang Mokokchung Press Club tir, Limalenden Longkumer-i tarur pela agizük aser iba anogomung indang rateta ashi.

Akangnungsang Jamir-i jembiba mapang, nüburtem taginüba ola ajak nem angashidaksütsü atema osangbener mapa tulu lir, ta ashi.

Osangbener ya noksa tangoker mesüra sentong ka indang osang abener ama malitsüla saka osang tajung abentsü tejangraba nung inyaksüla, ta pai ashi.

Iba sentong nung Sashimeren Jamir, Secretary, Mokokchung Press Club ajanga melepzüng o jembiba aser "Who is not afraid of Media?" omen nung ajemdaker sensaksem kaa liasü.

Mokokchung nung HGs, CD & SDRF indang office tasen semzük

Dimapur, Yimpoksüi/Nov. 16 (TYO): Director General, Prison, Home Guards, Civil Defense & State Disaster Response Force (SDRF), Nagaland, Rupin Sharma, IPS ajanga November 16, 2021 nü Home Guards, Civil Defence & State Disaster Response Force, Mokokchung indang District Commandant Office tasenba semzükja liasü.

Iba sentong nung jembiba mapang Sharma-i office tasenba takok ngua yangluba

nung shilem agir ajunga dang pelaba lemsatapa liasü.

Mokokchung nung iba office tasenba nungi nübur tenzüka tsütsü tajungtiba inyaksü teimla lir, ta pai ashi.

Pai sentepa alirtem dang Home Guards tem akumtsübua amshitsü ayongzü, kechiaser parnoki lendong timtem mapang mapa tulu inyaker, ta ashi.

Paisa Home Guards, Civil Defence & State Disaster Response Force (SDRF) Mokokchung indang

'Newsletter' sayaja liasü.

Iba sentong nung District Commandant indang office yangluba technical report ya E.E P.E.P, Alichen, Mokokchung, Er. Kito Anche ajanga agütsü.

Sentong nung District Commandant HGs' CD & SDRF, Mokokchung, Mulai Lamniah menden liasü aser Dy. Commandant General HGs & CD and SDRF, Medozhalie Pienyu ajanga melepzüng o jembiba liasü.



New Delhi, Yimpoksüi/Nov. 16: Advisor, Minority Affairs, Govt. of Nagaland, Zhaleo Rio, IAS (Retd.) ajanga November 16, 2021 nü Union Minister of Minority Affairs, Muktar Abbas Naqvi den New Delhi nung pa indang office nung ajuru liasü. Iba mapang Advisor-i Nagaland nung ki-o-jen balala terenlok nüngdakba indang lemsatapa aser Nagaland nung district ajunga nung 'Minority Blocks' sangdongtsü atema jembiba liasü. Tang tashinung state nung Minority Community Block ya Niuland nung dang agizüka lir. Union Minister-i item mapa tekeraba nung reprangtsütsü langzüa liasü.

Nagaland CM-i Export Facilitation Cell semzüktsütsü

Dimapur, Yimpoksüi/Nov. 16 (TYO): Chief Minister, Nagaland, Neiphiu Rio-i November 17, 2021

Facilitation Cell" semzüktsütsü. Iba sentong ya Capital Convention Centre, Kohima nung agütsü, aser yangji Vice Chancellor, Indian Institute of Foreign Trade, Dr. Manoj Pant indang "Export adentsü.

Nisung kati prangbong ana dak tema amshitsü memelar

Dimapur, Yimpoksüi/Nov. 16 (TYO): Arms (Amendment) Act, 2019 dak sendakba nung Home Department ajanga tuyuba ama prangbong license alir kabu nung prangbong ana dak tali ayutsü memelar, ta Deputy Commissioner of Police (Crime), Dimapur ajanga sangdong ka nung metetdaksü.

as er tanünga prangbong ya anasatiba police station indang officer-in-charge mesüra licensed dealer mesüra unit armory nung Union indang armed forces nung züngsem nem agütsütsüla, ta sangdong ajanga ashi.

License alir kabu nung prangbong ana ayutsü melar

Anungji Dimapur district kübok Arms license alir ajak dang iba totuyuba sülen anidaksü metetdaksür, ta ashi.

Mokokchung nung shi jenjang melenshistsür

Dimapur, Yimpoksüi/Nov. 16 (TYO): Mokokchung Municipal kübok nashi/jang shi jenjang melenshistsür, ta ADC & Administrator, Mokokchung Municipal Council, Shashank Pratap Singh IAS ajanga sangdong ka nung metetdaksü.

board ayutsüla aser shia aliba jenjang nung shi ayoktsüla. Iba totuyuba sülen manidaker nem tapet temerenshi agütsütsü, ta sangdong ajanga ashi.

Shileper ajungai pei shilepba tesem nung shi jenjang indang

Jenjang atetja aliba dak tali sen meshira, nüburi cash memo/bills meshitsü aser office nem osang agütsütsü ajungshir, ta sangdong ajangasa ashi.

- | | |
|----------------------------------|------------------|
| 1. Shi talangsa (Cut Meat) | Rs. 250/- per Kg |
| 2. Tar/tepin (Intestine/Stomach) | Rs. 200/- per Kg |
| 3. Tekolak/Tetsüng/Takep | Rs. 80/- per Kg |



Child Rights Week nüngtem nung District Child Protection Unit (DCPU) Mon ajanga "Education is the most powerful weapon to transform society" omen nung ajemdaker November 15, 2021 nü Langsa Hill Children's Home, Mon nung child rights arts/poster competition ayongzüka liasü. Iba tetoktepba ya Class LKG-6, Class 6-7 aser Class 8-9 lemsar agia takok angur nem sempet agüja liasü.

Nübertem indang khuret...

(TAPAK 1 NUNGI...)

"Naga nungeri politics nung dang temolung agütsüba ajanga rongsenketzüng tsütsü terenlok mali, lokti nung temelenshi madoker aser sobaliba jangjashitsü asoshi mapa meinyaker" ta Padma Bhushan, Dr. SC Jamir-i metetdaksü.

Treasurer Dilip Sharma-i anküp tepela o jembiba.

Naga yimten tebilemtsü atema jembidang "Naga yimten teloktemi küm aika India sorkar den jembiba arudang alima nung inyaksangshiba meteta aküm aser tenük lapok. Iba jagi parnoki India sorkar den Framework Agreement aser Agreed Position nung sign sütep aser iba ya Naga nung ajungtsü atema bilemba nangzüktepba asütsü" ta pai ashi.

Mongulbarnü Kohima nung Department of Information and Public Relations (DIPR)-i State level sentong ka ayonga agi

Iba sentong nung mendenji DPC Information & Publicity Secretary, Akangjungla liasü, Tatong Tir Temjen Anichar-i tesentepertem pelaa agizük aser

Iba sentong nung tetushi süa jaokerji Advisor to Chief Minister, Abu Metha liasü aser pai Nagaland nung media dang ochi jembitsü aser ochi metsübutsü ayongzü.

Külen, Kohima Press Club-ia Hotel Eastgate nung ayongzüka agiba sentong nung Morung Express nung Principal Correspondent, Imkong Walling-i Kohima Press Club Impact Journalism Award 2021 agizüka liasü.

Maneni, Nagaland Governor Prof. Jagdish Mukhi aser Chief Minister Neiphiu Rio naprongi press aser media fraternity dang National Press Day salem metetdaksü.

Dec 30 tashi nung Assam & Meghalaya arrtsü ken o tem angatetteptsü



Meghalaya chief minister Conrad K Sangma aser Assam chief minister Himanta Biswa Sarma nungertem Langpih nung tangokba noksa nung angur.

Guwahati, November 16, 2021 (Agencies): Assam aser Meghalaya sorkartemi December 30, 2021 tashi nung state ana tsünga arrtsü mangatettep onüktem angatetteptsü alizüng lir.

Mongulbarnü Khanapara kübok Koinadhara nung Assam chief minister Himanta Biswa Sarma aser Meghalaya chief minister Conrad K Sangma nati iba osang metetdaksü.

Langpih nung arrtsü mangatettep aliba tesem semdangba sülen chief minister anati osangbenertem den sensaksem mapang ka agi.

Assam-Meghalaya arrtsü nung mangatettep aliba tesem

12 lir ta Assam chief minister Sarma-i ashi.

Iba atema state anati mezüng shilem nung tesem 6 angatetteptsü meranger, ta pai ashi.

Tesem trokji- Tarabari, Gizang, Hahim, Boklapara, Khanapara-Philangkata aser Ratachera lir.

"December 30, 2021 tashi nung item tesem trok nung arrtsü mangatettep aliba onüktem angatetteptsü" ta Chief minister Sarma-i ashi.

Agriculture minister Atul Bora-i aniba high-powered committee ajanga November 30, 2021 tashi nung osang ka agütsütsü ta paisa shisem.

"State ana tsünga tangatettep nung arrtsü ken o tem bentettsü" ta Meghalaya chief minister Conrad Sangma-ia ashi.

Khuret angatetteptsü atema nisungtemi amalitep lidaksünür, ta paisa mepishi.

"Assam aser Meghalaya tsünga arrtsü mangatettep atema ni Meghalaya CM Conrad Sangma den Kamrup kübok Lower Lumpi semdang" ta Sarma-i metetdaksü.

"Assam CM Sarma künati Langpih semdangi aoer. Iba ya Meghalaya-Assam arrtsü nung yim ka lir. Mapang talangka arrtsü ken o aliba angatetteptsü imlar" ta Conrad-ia ashi.

Income Tax ketdangsürtemi Kailash Lohia'er ki & office mita ao

Guwahati, November 16, 2021 (Agencies): Guwahati nung tanep 10:30 ako nungi Income Tax ketdangsürtemi tesem balala mita senzüogo.

Christian Basti aser Fancy Bazar nung Income Tax ketdangsürtemi Lohia Group indang office tem mita ao.

Parnokisa Lohia Group of companies chairman Kailash Lohia'er ki mita liasü.

Kailash Chandra Lohia aser pa indang company temi tax magütsüba ken o tem benokba atema mita ao.

Income Tax officer telokji Kolkata nungi aru ta osang angazüker.

Mapang shia Kailash

Chandra Lohia aser par Topcem Cement indang osang tamajungtem adoker.

March 23, 2021 nü Commissioner for Persons with Disabilities, Assam-i Topcem Cement chairman Kailash Chandra Lohia dang parnok okadaki arutsü tetuyuba agütsü.

Topcem Cement-i persons with disabilities nem temeten magütsüba ken o atema Commissioner for Persons with Disabilities, Assam-i pa jaoka liasü.

Assam nungi Pratibandhi Suraksha Sangsha-i March 15 nü Topcem Cement aser Rotary Club, Guwahati Luit anema ken o ka benok.

Guwahati nung sorkar school ka nung matamabensartem nem metsümeshidak meyaglutsüba atema pai iba ken o benok.

Indian Bureau of Mines-i 2021-22 nungi 2025-26 tashi Meghalaya Cements Ltd indang mining plan magizük.

Meghalaya Cements Ltd ajanga Topcem Cement yanglur.

"South Khliehri limestone mine indang Mining Plan magizüker" ta Regional Controller of Mines of the Indian Bureau of Mines PK Bhattacharjee-i Meghalaya Cements Ltd director Kailash Chandra Lohia dang shidi ka zülü.



Hombarnü Assam Rifles sepaitemi Champhai district nung Rs 24,64,800 alangba kozüjang bosta 79 apu. Osang tejangka ka angazükba sülen 8 Assam Rifles, 10 Assam Rifles, 11 Assam Rifles aser Customs Department, Champhai külem telok kati mita aodang kozüjang apu aser iba dak sendakba nung nisung ka puogo. (Aizawl, November 16)

Mizoram nung 46 Assam Rifles sepaitem nem tetushi agütsü

Aizawl, November 16, 2021 (Agencies): Mizoram nung 2 Assam Rifles-i 46 Assam Rifles nungi taküm bendanga agütsüba sepaitem nem tetushi agütsüba sentong ka ayonga agiogo.

Honibarnü Manipur nung Khuga Battalion indang Commanding Officer Colonel Tripathi, pa kinungtsü Anuja (36), jabaso Abeer (5) aser sepai pezü khaset.

Iba sentong nung Mizoram governor, Mizoram DGP, BSF Sector Headquarter DIG, Commanding Officer 457 Field

hospital, SIB Joint Deputy Director, NGOs, Journalists, Ex service men, kaketshirtem aser Assam Rifles sepaitemi parnok nem tetushi agütsü.

Col Viplav Tripathi ya taoba mapang Mizoram nung mapa lemozüka inyakogo aser pa lisopurtem yariba atema kanga nüngtugu lir.

Pa lenisüba kübok Battalion-i mapa tajung aika inyaktsüogo.

Pa nem tetushi agüja tanü memorial service ka ayonga agi aser iba nung par medemertemi o jembi.

Meghalaya CM-i Nongknum renloktsü atema Rs. 13 crore agütsütsü



Nongknum

Shillong, November 16, 2021 (Agencies): West Khasi Hills kübok Nongknum nung atema Meghalaya chief minister Conrad K. Sangma-i 'Rs. 13 cr special package' agütsütsü osang metetdaksüogo.

Assam nung Majuli sülen Asia nung river Island tulutibaji Nongknum lir.

Meghalaya CM-i par kibong den district administration ketdangsürtem anir iba tesem semdanga liasü.

Nongstoin nung Producer

Groups (PGs) den ajurutepa sensaksemtsü atema Meghalaya CM aru.

State sorkari aluyimertem asoshi Rs. 200 crore lemozükja lir, ta Meghalaya CM Conrad-i metetdaksü.

"Sorkari aluyimertem indang tebilemstü aser khurettem angatsü molunga lir aser nenok ajangzüktsü atema policy tajungtem yanglutsü" ta pai ashi.

Meghalaya CM-isa Nongstoin - Wahkaji and Nongstoin - Nongknum road semdanga liasü.

CADC brick factory ajanga Rs 1 crore aazüktsü



Brick factory lapoktsüba noksa nung angur.

Aizawl, November 16, 2021 (Agencies): Udalthana-I nung Chakma Autonomous District Council (CADC)-i lapokba brick factory ajanga küm shia Rs 1 crore shi aazüktsü, ta CEM Rasik Mohan Chakma-i ashi.

CADC nung industry department-i Udalthana-I nung yangluba brick factory ya Hombarnü Chief executive Member (CEM) Rasik Mohan Chakma-i lapoktsü.

Iba brick factory yangluba ya council atema tongtipang mapa ka lir aser iba ajanga nisung aika

nem mapa inyaktsü maongka agütsütsü, ta CEM-i ashi.

Iba sentong nung Chakma Autonomous District Council züngsemtem, council ketdangsürtem aser Udalthana-I o Udalthana-II nungi village council lennirtem aden.

Iba brick factory ya Grant-in-Aid Fund, 2019-2020 nungi Rs.70.16 lakh endoka yanglu aser ita shia ita lakh 5 shi yanglutettsü.

Iba factory nung machine ka Rs. 10 lakh agi alia enoka lir aser iba ajanga minute shia italung 18 yangluteter.



TIR YIMYIM YIMOBILEM (EDITORIAL)

DIMAPUR RASEMNÜ, YIMPOKSÜ (NOVEMBER) 17, 2021

Nübortemi kechi ashir ?

Osangbenertemi yimten yimsüsürtemi ashiba dang masü saka nübortemi kechi ashir ta asüba nung temulung tagütsüba agüja inyaksüla ta Wb.Dr.S.C. Jamiri Sangtenu (Mongolbar nü) Dimapur nung osangbenertem anogo amongba sentong nung jembidang ashiba o nung tebilemdangtsü, tagitsü aser teinyaksü tongtibang wadang ka sayuogo. Atangji, osangbenertemi dang masü saka aiben asenok nübortemia asenok koma aliar ta masü saka asenok lenirtemi asenok indang koma ashir ta asüba nungang temulung tagütsüba agüja angar. Idangji, asenok asangsangba tiabo amadoker pongmang lima nung alir ama asenok akümüli südaktsür. Alima nung meimchir yimya asünungji, yimsüsür lenir kati lokti nung jembidang, kodanga pei tashimait aser tamakok indangbo mashitsü, saka peii agütsüba aser inyaksüba indang dang ashitsü. Aji oda, government sen agi inyakba asüyonga pei meyong sen agi inyaksü ama dang jembitsü aser asenokia idakji amanga, yimjak nung tenüngsang agütsüteptsü. Tanga mapangjibo yutsür linük nüchiso anguba aser temzüng ozüng lateta amshi tenzükbä anogomong bilemteta amongba sentongtem nung yimsüsürtemi jembibatemi angadagra, tejembiba o ajungaji government-i nübortem asoshi wadang balala nung takok ngua inyaksüba mapatem indang dang shia angashitsü. Atangji, linük yimten nüchiso anguba anogomong amaji yimten tamakok indang jembiba mapang masü, ibayongji government kübok ministry aser department balalai nübortem anisüngzüka jasadaktsüsa atema gari lenmang kilometer aika junga yanglutsüba indang, aluyimertem asoshi teyari lenmang lapoktsüba indang, tanurtem asoshi kaketreju tajung lapokja chiyongtsü tashi agüja anepaluba indang, mozü kidang nübortem angati taneptsü angutsü atema senotsü aika endoka inyakba indang, lanurtem mapa angutsüsa lenmang tapu balala lapoktsüba indang, nübortem nem tzu tajemtsü aser light tesangwa agütsüba indang shir meshima nübortem asoshi tajung inyaksüba indang ghonda dak tali agia azüngtsü. Aji oda, akhi mapang nunga kodangsa lokti senden nung yimten lenirtemi jembidir, pei telok ajungba indang aser peii nübortem asoshi inyaksüba indang dang shipet ashitsü. Ibaji angar osangbenertemia government-i inyakba tajungtemji zülutsüsa aser nübortemia o tajung jembibaji teka maa agizüktsü. Ajisüaka, lokti senden senshia nübortem kidangi aodangang, shitakba gari lenmang tia metettsü, ki tonger külenang tzu aser light shitak arur asü maruar metettsü. Aji oda, government osang nungbo aluyimertemi alu nungi chirmechima züsentetba indang ashitsüa akok, saka kidangi orr külenang shitakba jangpong tiajibo metettsü. Ibayongji, osangbenertem mapaji yimjak nung yimten lenirtemi kechi ashir ta asübaji masü saka shitakba nübortem kechi tia nung lir ta tonga oagi asüngdangtepa, parnok taküm mapa aser kibong otsütem yanglua nübortem den lemsateptsübjang tongtibangba lir ta angatetdaksür. Iba jagi nübortem tuluka nung yaritsü. Iba jagiang osangbenertem mapaji nübortem tenzükbä mapaa ta tali jangjatsü. Atangji, iba amaji osangbenertemi nübortem jenjang tajungba kümdaktsüsa bilema, timtem aser nüngsen agia, inyaksünüyonga, nübortemi ola madokra osangbenertem olaji tom nung samatsü. Aji oda, nübortemia osangbenertemi pei meyong osangbenertem ama bilema, pei alidak pei nübortem jangratema aliba asüyonga mesüra timtema aliba indang asüyong temulung lapoka, külem mapa ama bilema osangbenertem den lemsatepra, iba jagi mangutsüba katoa angutsü, manepsüba katoa anepsü aser mapa ajak shitak inyak tenzükbä. Atangji, yimten lenirtemi ashi ama, tesem kar nungbo terenlok mapa kanga junga inyaka alitsü. Tesem kar nungbo alua kanga junga yima alitsü aser government kaketreju aser mozü kitemang kanga junga anepalua alitsü. Itemjia kodang osangtsüsang ajanga nübortem nem metetdaksüdir, item jagi tangartema ajungshitsü aser teinyakertema pelatsü. Aji oda, lenirtemi kechi ashir ta masü saka nübortemi kechi ashir ta asübajiang asenok 'democratic' yimten nungbo kanga tongtibang lir.

OLEMSABANG

"LEPER TEJEN MEKAKSHTEPI KOTAKI AOTSÜ MERANGTEPTSÜLA"

~ Mr. I. Temjen Tzüdir.

Tsüngrem taochi ajanga tanü aseni amongba Yisu yimsü tajung ya Naga nunger rongnungbo asen Ao limai mezüng aru. Tsüngrem tenüng sangdi. Mezüng iba yimsü tajung Molungkimong yimdak tenzükbä aser ibaji shiangaia nonga ta meshitettsü. Saka Dr. Clark-i anir iba yimsüji tali teküratiba nung renloka odaktsünüyong tokolak bushitepba mapang, tekong nung nok agi aleptsü tsübusetaka, pei tekong nungji meyimdanga aser tetsübu agi metsübu kümdaktsür yim tasen ka kümteta iba yimsüji mesamai ayimsünga yangertet. Tanü iba indang jembiteper.

Anungji Aolisanger Rev-tem, Pastortem, Missionary-tem aser tamanger ajak, yamai asatepa, takok intsütepa, nüngsang bushitepa makazüi Dr. Clarki kechi nükjidong nung iba yimsü asen limai bener arutsü ibaji atalokdaksütsü atema ajaki yamai ka bilemdang nung koda?

- Molungkimong li nung iba yimsü ya tenzükbä, anungji par yimtsüng arogo 2022 küm Yisu yimsü arur küm 150 abensaba benjong amungtsüji shitak dang.
- Molungyimsen, nüngja kija jagia Molung yim anapronglaji Molung nunger dang ta jangjangjaa angateter, tetezü Molungyimsen nungerji Molungkimong nung alirtem dangsa asüba saka Yisu yimsü tajungji mesamadaktsünüyong yim tasenji küma aoba. Anungji Yisu Yimsü mesamadaktsünüyong ali shi temang tashiji mapayui bendanga agütsür iba yimsüji renema bener yim tasenji aküm asünung item nisungtemjia iba kasa Yisu yimsü arur küm 150 ajungba benjongmung amungtsüjia shitak dang.
- Item yim ana nübortem dangi aruba aser parnok amangba yimsü tentetji (Molung Mission-ji) tesülen Impuri belener atu, anungji tang Impur nung aliba amangbapur Mungdangji küm 150 abensaba benjong amungtsübjia shitak dang.

Anungji Aor khristan tajungtem, ya shisadangdi. Dr. Clark-i bener aruba yimsü nung telemsa mali, raratep mali, khonang nüngsang bushitepbaa mali, tuluba, tama ta sünüba-a mali saka "Khrista nung ka dang aser tamanger ajakji kotaki tudaktsünür". Anungji Molungkimonga, Molungyimsena aser ABAM ajak 2022 küm Ao Limai Khrista Yimsü Tajung Arur Küm 150 Abensaba "WASÜMUNG" (Jubilee) kodang mungnüdir mungdaktsütsüla.

Yamaji mesüra tang jembitepba aser osang kaket balala zülutepba sasepbo asen limai Yisu yimsü tajung arur küm 149 tashi arudang Aor tamanger rongnung (Baptist) telemsa melii aruba küm 150 abensadangbo Aor rongnung telemsa lir alitsü amai repringteter aser aji shiri tashi mangai tekong meranga adokdaksüdir pa/la aser parnok dak Tsüngremer lung jagi aotsü aser itemji ajasaa aotsü. Anungji "Nisung tsüngdang shitak mesükba lenmang ka lir aser iba tatembangji tasüba" iba orenji ajaki bilemtetdi.

Asenok meimchirtem ya iba lima yagi aeini aruba nisungtem ka ka lir

~ R. Imkong Lkr, Mangimen

Tanü asenok meimchirtem ya iba lima yagi Aeinertem ka ka mesüka aruba nübortem lir, aji oda asenok meimchirtem ya mapang tatsüka atema iba lima nung litepdagi. Yamaji asenok meimchirtem ya mapang tatsüka liyonga aotang karibo nisung ajka den kanga junga liteter, parnok asoshi koda jangratemtsü tulu lir. Saka nisung karibo alima ajonga ya pa mesüra la kapu nung tang yunüba shisatsü repringteter. Iba jagi tanü takartem aser tulurtem-i pei linütsü liteper aser sensakertem kanga mezüngmeshiba angur aser ajurua arudagi, aser ano item jagisa ali rongsen temeimba aser taginüba ta repringteter. Yamaji sensakertem ali rongsen tera akaba ajak tu takartem aser tulurtemi okshia bener oadoker, aser kodang sensakertem tera akaba ajak tu takartem aser tulurtem küti iadokdir, item sensakertem tu odanga kecha makai alitang parnok küt nung anarongtena osettsüset süale, mesüra ali rongsen süale ata-mata ka yua akaba jaka tu okshia tulurtem aser takartem küti aitsüsa mapangi bener arutsüdir, aser item sensakertem tu kanga alashia akümer. "Those poor peoples aser living in a hopeless condition". Idangji takartem aser tulurtem tu parnok madakji chubatsüsa akümer, (Apijemtsü shin o 22:7 = Takar jagi sensaker madak chubar; aser tapurji taputsür kilir (lir) akümer. Aser kodang sensakertem tu kanga alashia kümdir idangjiang tulurtem aser takartem tu molamoshia akümtsüsa mapangi bener arutsür, aser parnokji alima nung tasoshia jangratema aliba angur. Saka parnok jagi sensaker aser lenimaortem tu atalaja menütsür aser ashir, item sensakertem ya parnok sasa tali mashiba agi timatemer ta menüja sensatsür; aser item sensaker aser lenimarotem tu shiruru mesüka tang bilemtsür. Saka parnok dak meima bilemtsüba shsiatsü tu malir, iba jagi temeshi laishibai yamai ashir, takartemi kodak yimli-i aitsü koda tasak lir ta yisui Pa nütsüngtem dan ashiba angur. Mathi 19:23.

Anungji asenok iba lima nung tatsüka alitang shiba südir sang, asen taküm jung aliba anogotem nung asen teyanglur Tsüngrem tsüngdang ochi shia mapa tajung tagizükttetsüsa inyaka alitsübaji kanga tongtibang ta angatetdaksüner. Ajita mesüra, anogo tamajungtem arua asen taküm dak kongshidangbo ayaku atentsü, anungji tsünglu marudang asenoki anüshi (sütsü) lepa renema yua atadi ni? ta ayongzüker.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngerü angateta agitsü mepishir**

Tayimtsü ajanga Ethiopia nungi Yihuda nunger Israel-i anir arutsü



March 11, 2021 nü Ethiopia Yihuda nunger Tel Aviv anasa aliba Ben Gurion International Airport tonga arudang tangokba noksa nung angur.

Jerusalem, November 16 (Agencies): Tang Ethiopia linük nung civil war aliba mapang nung Israel nunger lenirtemi Ethiopia linük nungi Yihuda nunger meyrjang aika anir arutsü atema asalentong yanglua inyakdar.

Ajisüaka Israel nung kinünger aliba Ethiopia Yihuda nunger dang anir arutsü; tetezü Ethiopia nung 5,000 shi dang tayimtsü ajanga Israel-i anir arutsü saka koba mapang tashi ka nung anir arutsüar tang tashi nungbo mejangja.

Iba dak sendakba nung

obang mapu mapang talangka aruba sülen taoba Mongolbarnü Aliyah & Integration Minister, Pnina Tamano-Shata aser Interior Minister, Ayelet Shaked nati iba linük nungjagi Yihuda nunger anir arutsü atema telemtetba agi.

Shaked-ibo Ethiopia nungertemji chichiba Yihuda nung masü aser iba linük nungji parnok lendong nung mali, ta shia parnok anir arutsü memelungi liasü saka Ethiopia tsür, Tamano-Shata-i, Yihuda nungertemji anir marura lai minister menden toktsütsü, ta amokmerena liasü.

Israel ketdangsertemi ashiba agi, tang Ethiopia nung Yihuda nung 7,000 shi lir aser parnok timbaka Tigray region nung lir. Yaküm December ita nungi tenzüka tang tashi nung Israel-i Yihuda nung 2,000 shi Ethiopia nungi anir aruogo.

Alima tesem balala nungi Yihuda nung Israel nung adenshiba dang 'Aliyah' ta ajar, aser tesüiba küm ishika tsüngda linük balala nungi Yihuda nung meyrjang aika Israel limai meypa odar, aser iba ya Laishiba nung shia aliba ataloker, ta aikati bilemer.

Uganda linük nung pastor ka tepset

Nairobi (Kenya), November 16 (Agencies): Uganda linük nung pastor kati Tenla ki bendoktsü mesüra belentsü memelungba agi October 26 nü Muslim yimsü alia amangertem tepset.

Nangonde, Namutumba District nung Muslim nütsüng timba lir. October 26 nü Pastor, Stephen Lugwire aser par jala na alui oa lia aonung 6:30 ako meta pa tepset; pa arrshi küm 58 liasü.

Osangbener den jembidang par jala, Brenda Lugwire-i, "Kübui san ka süngdong nung alenoka aliba salatsüba mapang tebur asem Islamic süoshi semer arua onoki memetetba oshi nung asaloktsü. Parnok ket nung kotari liasü aser parnok rongnung kati 'Pastor Lugwire ya mamanger ka lir, shibao Allah indang yimsü raksatsür, ta ashi'" ta metetdaksü.

"Parnok rongnung kati kübu dang, 'onoki nü dang onok

meyong mosque anasa aliba Tenla ki beneler oang ta metetdaksü, saka onoki tuyuba ama nai manga. Tanübo nai Allah terasaba angutsü' ta ashi," ta laisa metetdaksü.

Pastor Lugwire'er Arogo Tenla kidangji tesüiba küm ana tashi Khristantem tekülem sentong agia arur aser tawa Muslim nungeri parnok dang Tenla ki belener aotsü tuyua liasü.

"Parnok rongnung kati süng agi kübu dak azükba agi pa ali nung ondak, iba sülen kati kotari agi arang, anungji ni tetsübu nung agen," ta laisa ashi.

Kinüngertem police nem iba osangji metetdaksüba sülen parnok iba tesemji tonga aoba mapang nungbo pa süadoker liasü.

Bushisüngdangba ajanga Muslim nung asemji Muslim tsür takar ka, Shamimu'er kidang jenokba jangjaba nung ajemdaker la apu.

Pastor Lugwire-i pa kinüngtsü den jabaso ka aser jala tenet toktsür asü.

October 30 nü Pastor Lugwire den asüpila sentong agiba sülen Khristantem Muslim nung tekülem ki densema Muslim nungeri kiojen kar raksatsüba ajanga tensa raksago, ta police ketdangser kati metetdaksü.

Police aser lenirtem mapang shidak nung maru asü nungbo yimajak rongdokder lila, ta paisa metetdaksü.

Uganda linük temzüng nung dang masü saka tanga ozüngtem ajanga-a linük nung tamangba yimsü mashie amangtsü, pei yimsü proktsü aser tanga yimsü dangi meyiptsü atema senso ajak nem temeden agüja lir.

Tang Uganda nung nütsüng shilem 84 shi Khristantem lir aser nütsüng shilem 12 shi dang Muslim nung lir.

Khristantem reshikangshiba indang report ka ICC-i sangdongtsü

Washington D.C, November 15 (Agencies): International Christian Concern (ICC)-i alima nung Khristantem reshikangshiba aruba indang report tejangja ka sangdongtsü.

1995 küm nungi tenzüka tang tashi nung Khristantem reshikangshiba aruba report ji kaket tapak 150 nung agütsütsü.

Parnoki alima nung Khristantem tamajungtiba reshikangshiba linüktem, teloktem aser nijatem tenüng sangdongtsü. ICC otsü nung research project tulutibaji ibaji asütsü.

ICC-i takoksa angurtem interview agiba, reshikangshiba linüktem nung par staff tem nungi anguba osang aser

regional analyst 10 nungi anguba osang nung ajemdaker iba report renem.

Khristan melungtet teloktemi ashiba agi, tang alima nung reshikangshi tia nung aliba Khristan nütsüng million 340 dak tema lir, aser alima nung Khristan 8 shia nungi katibosa reshikangshi ajurudar.

ANOGO ABEN TSÜNGREM DEN

Chuba Putirtem

Nenok teshimetetba kin, chuba putir telok, temeshi kin, aser Tsüngrem pei agitsü purtem nenok lir.

1 Peter 2:9

Na Khristan ka, süra na Tsüngremi shimtetba putir ka lir. Chuba putir ka ama na maneni chuba dangi aotsü leman lapokja lir. Ne taküm nung nungdak adokra, na atema tetsüngdai air putir ka bushitsü menüngdak. Na chuba putir.

Aji oda süaka putira, pa mapa lir. Putir inyakyim kübok putir kati putir mapa inyaksüla. Laishiba nung putir kati kija inyakyim amshitsü shia mali, pa balaka tenzüka mapa mali. Putirtem külemi mapa inyaker (Lev. 9:1). Lairen masüba kija mapaji Tsüngrem putir kübok pai bilemba mapa nungi pilatsü akok.

Nübur matsüngdang putirji Tsüngrem melen noktakba lir, saka pai ano Tsüngrem dangi nübur tebilemba abener. Na meketa kar Tsüngrem dang mepishitsütsü putir sarasadem nungdaka lir asü? Karbo ne taküm nung Tsüngrem angu nung dang Tsüngrem metetta arutsüba alitsü akok. Khristaji shidakba taküm lir ta pa nübur taküm agi sayuba alimai nungdaker. Tsüngremi ajaba dang nungi asen mapa temaba südaktsübaji lendong lir. Asenok mezüngbuba putir asütsü aja, aser tanabuba mapa ka nung sotdaktsü aja. Kodang asenoki ibai meinyaklir asen meketa alir ajaki asenok ajanga Tsüngrem dangi aotsü songtemtsü. Tsüngremi secular mapa kati ajatsü akok, saka iba dang nungi talisa na Pa putir ka asütsü shimtet.

BSI Dimapur Auxiliary-i Wancho nunger nem Laishiba 5,032 agütsü



Dimapur, November 16 (TYO): November 12, 2021 nü Khanu Chop village Baptist Church nung Bible Society of India (BSI) Dimapur Auxiliary-i India aser Myanmar arrtsülen alir Wancho Naga nung nem Wancho oshi nung adokba Tasen Lai 5,032 lema agütsüogo.

Auxiliary Secretary, Rev. Dr. Yiepetso Wezah, Marketing Assistant Ganhang Aran aser Okato Yeptho nung den Executive Secretary, Honman Wangjen nungeri Laishibaji lema agütsü.

Iba project ya BSI Dimapur Auxiliary Committee-i benok aser Laishiba menünga angati alemtsü atema Rev. Dr. M. Mani Chacko, General Secretary aser Paul Stephen, Director, Publishing & Marketing Department nem mapa lemezükja liasü. Asüngdangba ama BSI-i agizük aser Dimapur Auxiliary-i

tenlaba nungi shilem 5 amshia Laishiba adok.

Wancho Naga nung ajak amai Khristantem lir, ajisüaka parnok oshi nung Laishiba maliasü. Anungji BSI Dimapur Auxiliary-i parnok nem Wancho oshi nung Tasen Lai angati lema agütsü. Wancho nung yimtsüngtem tonga Laishiba bener aotsü atema tetsüng agi ghonda 5-6 shi jaja liasü.

Wancho nungeri Khristantem tenüng nung Wancho Baptist Churches Association Executive Secretary, Honman Wangjen-i Bible Society of India dang pelaba lemsatepogo.

"Nüngdakbapurtem atema Laishiba meyiptsütsü, menüngtsü aser alemtsü atema sarasadem nung nungitba aser tenla agütsüba atema Arogotem aser nija ajak dang pelar. Taküm O ajanga Wancho nungeri Khristantem temoatsü angutsü atema onoki sarasadem," ta pai metetdaksü.



Ato Kilonser Narendra Modi-i Comptroller and Auditor General of India building nung Audit Diwas function nung shilem magi tsungda Bhimrao Ambedkar nem naro tokja akhüm tetushi agütsüba noksa nung angur.

Mopung menenba atema aluyimer dak matongtsüla: Rakesh Tikait

Ghaziabad, Yimpoksüi/ November 16 (Agencies): Bhartiya Kisan Union lenir Rakesh Tikait-i Mongolbarnü Supreme Court-i ken o asadanga dak ajemdaker, mopung menenba ya aluyimertem mesera monü rongtokba dak tai metongloksütsüla, ta shiogo. Bhartiya Kisan Union (BKU) national otongdar, shiba tang Centre indang aluyim ozüing asem anema Delhi arrtsü nung longkak aita aliba nung tongtibang lenir ka lir, paisa mopung menenba atema aluyimertem dak tai

tongloksürtem dang tatok meshitsü takhangba agütsüogo. "Mopung menenba atema aluyimertem dak tai tongloksürtemi aluyimertem dang tatok meshitsüla. Supreme Court-ia, mopung mendenba atema aluyimertem dak tai tongloksüba ya tim masü, kechiyong monü arongba ajanga mopung shilem ter dang menener aser aja talangba agi ita ka mesera ana dang asür ta shiogo," ta Tikait-i Hindi nung tweet asü. Tikai-i aniba BKU telok ya Samyukt Kisan Morcha (SKM) nung shilem ka lir. Parnoki 2020

küm November ita nungi tenzüka centre indang aluyimba ozüing asem anema Delhi arrtsü nung longkak aita arudar. Parnoki item ozüingtem agintsü akhanger aser jangotsü dak sendakba nung minimum support price atema legal guarantee ka agütsütsü akhanger. India anüolentip aser talisa Delhi NCR nung nüburtem health dak kongshitsüsa mopung menena akümer. Industry, gari aser puja bomb amala den bendenloksema monü arongba ajanga mopung jenjang mejungi akümer.

Kashmir nung civilian ana tepsetba bushisüngdangtsü akhanger

Srinagar, Yimpoksüi/ November 16 (Agencies): Hombor aonung Hyderpora nung kiranglongrar amakba mapang security force-i civilian ana tepsetba atema judicial inquiry ka benoktsü asoshi Jammu and Kashmir nung yimden yimsüsürtemi takhangba agütsüogo. Iba tatalokba nung kiralongrara asütsü ta temulung meleme bilemba nisung ana tepsetgo.

ashiba agi, civilian anaprongla ya kiralongrar nem teyari agütsürtem liasü.

People's Democratic Party tir Mehbooba Mufti-i iba tatalokba dak sendakba nung Centre sorkar aitsüogo.

"Tai maketba nüburtem tejenokdak ama amshia parnok cross firing nung tepsetba aser ayong ayonga parnok ya OGW tem (over ground workers) ta jatsüba ya tangbo GOI indang rulebook nung shilem ka kümogo. Ochi jangjatsü atema judicial enquiry ka nungdaker aser temerenshi magütsüi toktsüba inyakyim ya tembangtsütsüla," ta lai tweet asü.

National Conference vice president Omar Abdullah-ia, Hyderpora nung tatalokba ya tebandang makai bushisüngdangtsü khangogo.

(Maneni tapak 9 nung...)

BJP-i voter tem atsüa arutsü atema project tem lapoktsür: Sitaram

New Delhi, Yimpoksüi/ November 16 (Agencies): Ato Kilonser Narendra Modi-i Purvanchal Expressway lapoktsüba sülen Mongolbarnü CPM general secretary Sitaram Yechury-i, voter tem atsüa arutsü atema Bharatiya Janata Party (BJP)-i project tem lapoktsür ta ashi. ANI den sensaksemba mapang Yechury-i, "election tonga aruba mapang project tem aika lapoktsüdar aser nungshilong aziingsüba sentong tali ayongziuka agidar. Item ajak ya BJP nem vote agütsüdaaktsütsü atema nüburtem atsüa arutsü asoshi inyaker aser iba inyakyim ya nüburtemi temulung masür," ta ashi.

CPM lenirisa iba project ya benoka inyaktsü minyaktsü mejangja, ta ashi. "Uttar Pradesh aser Uttarakhand amala nung nüburtemi BJP sorkar dak temulung masür. Iba ajanga project balala tang lapoktsüyonga odar," ta paisa ashi. Ato Kilonser Narendra Modi-i Mongolbarnü Sultanpur district kübok Karwal Kheri nung Purvanchal Expressway lapoktsüogo. Ato Kilonser ya C-130 Hercules tayimtsü ka nung mener arua iba Expressway nung yanglua aliba airstrip nung anen. Kilometer 341 talang

Purvanchal Expressway ya Lucknow-Sultanpur road (NH-731) nung Lucknow district kübok Chaudsarai yimtsüng nungi tenzüker aser Uttar Pradesh-Bihar arrtsü nungi kilometer 18 pila aliba National Highway number 31 kübok Hydaria yimtsüng nung tembanger. Iba Expressway nung tongtibang feature kaji 3.2 km talang airstrip ka yanglua aliba ya asütsü aser jongdak mapang iba lenmang nung Indian Air Force fighter plane tem anentetsü aser apusoa otetsü. Uttar Pradesh nung assembly constituency 403 atema election taruba küm agitsü lir.

Kartarpur Sahib corridor Bodhbarnü nungi lapoktsü: Amit Shah



New Delhi, Yimpoksüi/ November 16 (Agencies): Union home minister Amit Shah-i Mongolbarnü ashiba agi, Narendra Modi-i aniba sorkari telemtetba agiba ama Kartarpur Sahib corridor Bodhbarnü nungi lapokshitsü.

Shah-i, sorkari iba corridor lapoktsütsü telemtetba agiba ajanga linük ajunga nung nüburtem tali pelateptsü, ta ashi.

"Linük ajunga November 19 nü Guru Nanak Dev indang Prakash Utsav amungtsü renema lir aser PM @NarendraModi govt-i Kartarpur Sahib corridor lapoktsütsü atema telemtetba agiba ajanga linük ajunga nung nüburtem tali pelateptsü," ta pai ashi.

Mongolbar anepdang news agency ANI sangdong ka ajanga Ministry of External Affairs aser Union Home Ministry-i, Kartarpur corridor lapoktsütsü atema asadangdar aser official osang ka yakta agütsütsü ta sangdonger liasü.

Taoba Punjab chief minister Amarinder Singh, shibai PM dang Guru Nanak Jayanti matong tsungda iba telemtetba agitsü mepeshia liasü, paia iba jenjang agiba atema Modi aser Shah na dang kanga pelaba lemsatepogo. Pai ashiba agi, iba corridor mapang shidak nung lapoktsüba ajanga nüburtem meyirejang aikati Guru Purav amungba mapang Nanak nem akhüm tetushi agütsütettsü.



Bollywood actress Kangana Ranaut-i India nüjiso dak sendakba nung la tebilemba lemsatepba anema Nationalist Congress Party (NCP) workers temi Shivaji Maharaj Chowk, Vashi, Navi Mumbai nung longkak aitba noksa nung angur.

Xi aser Biden na 'virtual' senden tembangogo



Washington, Yimpoksüi/Nov. 16 (Agencies): US Tir Joe Biden-i China Tir Xi Jinping den 'virtual' yimya nung jembiba mapang China aser US tsungta tali ochishia osangtsüasang agiteptsü ajungshia liasü.

Taiwan, Hong Kong aser Beijing-i linük anüolen tezülen Xinjiang region nung Muslim Uighurs nunger mejungi amshiba amala ken o mechi linük ana tsungta tesendaktep tamajungba kuma aoba mapang lenir ana ya video conference ajanga jembishinüa liasü.

Hombar aonung iba senden mamendang US aser China tokteptsü ya imla liasü saka tetoktepa nungi mangatetep madoktsü asoshi lenir ama ibai Xi küna tebilemtsü lir, ta Biden-i shia liasü.

"Aser ibaji kanga tongtipang amai nibo bilemer, kechiaser linük balala nungi lenirtemi küna tesendaktep indang asungdangba mapang, onok mapang shia jembishinü alir, ta

ashir. Kati ka den ochishia jembishinü alir," ta pai shia liasü.

Ajisüaka Biden-i jembiba ya pa indang administration tenzükli amaibo masü, kechiaser March ita US aser China ketdangsürtem ajurutepeba mapang mepelai o langzütep aser China indang diplomat lenir aser Politburo züngsem Yang Jiechi-i Secretary of State Antony Blinken dang China telungzük inyaksangshi tiyongi maittsü shia liasü.

Iba sülen Biden administration aser Beijing tsungta o tesepra jembitepa aru aser item rongnung Taiwan indang Air Defence Identification Zone telungi China aitba densema lir. Nütsung yongsük million 23 dak tema pei sasa democracy yimya nung yimsü asüba asetkong, Taiwan ya China-i par indang ta ashir, aser US-i iba asetkong ya Indo-Pacific nung tongtipang tembar ka ama züngshir.

Xi den jembiba mapang,

Taiwan Strait nung tensa mejungi kumdaktsütsü asoshi linük ka kijai inyakba US-i anema nokdaker, ta Biden-i ashi.

Beijing nungi jembiba mapang, linük ana tsungta tetsükdaktsü aika ajurur, ta Xi-ia ashi.

Pai Biden ya pa indang tembar tejen ka ama jembiba aser tena tali lungjemshir inyaksüla, ta shia liasü.

"China aser United States amalitep aser osangtsüasang agitepeba tali akumtsü nungdaker," ta pai ashi.

Tena ya ghonda asem ser tesadang dak tali sensaksema liasü aser anungdang 12:30 ako (par mapang) sülen tembang, ta osang ka ajanga ashi.

January ita Biden-i US Tir menden agizükba sülen lenir ana tsungta phone agi anaben jembio go saka coronavirus tashidak wara adokba sülen Xi ya China alema mao, anungji tena ajuruteptsü teimla kangabo mesayur.

Uganda yimtiba nung suicide bomb ana apok

Kampala, Yimpoksüi/Nov. 16 (Agencies): Uganda yimtiba, Kampala nung suicide bomb ana apokba lendong nung nisung asem asü aser 33 yiru, ta police temi ashi.

Uganda yimtiba, Kampala nung takum bendanga agütsür bomb ana pokloksüba lendong nung nisung asem asü aser 33 yiru, koba tesüiba ita nungi lendong ataloka aruba nung tesüsaba alitsü, ta police-i ashi.

"Tang tashinung nisung 33 yiruba jangjaogo aser parnok rongnung pungo kangasa sashia yiru," ta police odongtar Fred Enanga-i osangbener senden ka nung ashi.

Bomb ya ka parliament anasa aser ka central police station anasa apok aser iba mapang office nung inyakterem tesem balalai jenshia ao aser anüngleni mokozü temesung pokteta atu.

Uganda indang Internet Exchange Point nung executive director Kyle Spencer-i osangbener dang ashiba agi, iba bomb ola ya angashia anasa aliba nisungtem kanga aoksatep.

"Parliament-i aoba lenmang tem shibangogo, yangji nisungtem jepteper, aser tanungba nisungtem iba tesem yutsür aotsü meranger," ta pai ashi.

"Nisung ajaki office tem azüngtetsür aser ki shibanger aser nisung maitdaktsür."

Ibai amakba ka lir, saka shir mapa aji tang bushisüngdangba mapang lir, ta Uganda indang Assistant Inspector General of police Edward Ochom-i shia liasü.

Ozüng yanglur kar parliament müketa atsübanga aliba jara len nungi ainshia liasü, ta national broadcaster UBC

ajanga ashi.

Lenmang nung nisung shi zükshia liasü, ta Ugandan news channel, NTV Uganda nung osangbener kati ashi.

Iba lendong nung metettepa alir ka asü, ta Kampala Central indang Mayor, Salim Uhuru-i Twitter nung zülutsü.

Uganda Red Cross odongtar Irene Nakasiita-i par telok ka iba tesemi yokogo, ta ashi. Lendong atalokba tesem nung kuli ngutettsü atema sepaitemi azü anir arua liasü.

Tang tashi iba lendong agütsüba telok kati tenung agia mali.

Tawa bomb lendong balala ajurua aruba ajanga Uganda ketdangsürtemi nüburtem aser mitkartem dang saksalema alitsü ajungshia arua liasü.

Kampala nung aliba restarurant ka nung October 23 nü bomb tesashi ka poka yangjia nisung ka asü aser nisung tenet yirua liasü. Ananü lira no passenger bus ka nung bomb ka apok saka bomb pokloksüsang dang asü, ta police temi ashi.

Item lendong ya matalokdang UK sorkari Uganda dang kanga kumdanga senzüsempongtsü ashi aser kiralongrar temi lendong agütsütsü akok, ta shia liasü.

Taoba ita restaurant nung atalokba lendong ya central Africa nung ISIL telok den sendaktepa aliba Allied Democratic Forces temi tenung agia liasü.

Iba telok yagi mapang talangka nungi Tir Yoweri Museveni anema aru, shiba US tembar ka lir aser al-Shabab telungpur telok nungi federal sorkar kumzüka ayutsü atema Somalia nung peacekeeper mezüngbuba pai yoka liasü.

Tir Duterte-i Philippines Senate atema tokteptsü



Manila, Yimpoksüi/Nov. 16 (Agencies): Philippines Tir Rodrigo Duterte-i taruba küm election nung senator atema tokteptsü, ta pa den yariteper kati ashi, anungji par jala den vice president atema tokteptsü akok ta takzüa aruba tembangogo.

Duterte den yariteper Christopher "Bong" Go, shiba senator ka lir aser tir atema tokteptsü lir, pai osangbener dang Hombarnü ashiba agi, 2022 küm May ita election nung Duterte-i Senate menden ka arishitsü.

Duterte indang

communication chief-ibo tir ya tatong tir atema tokteptsü aser par jala Sara Duterte-Carpio den tokteptsü, ta Honibarnü shia liasü.

Tir indang odongtar Harry Roque-ia tatong tir atema metokteptsü, ta Hombarnep shir liasü.

"Tebu aser jala, Tir Rodrigo Roa Duterte aser Mayor Inday Sara na kati ka meimer. Tena kodanga kati ka anema metokteptsü," ta Roque-i senator atema tokteptsü asoshi tenung agütsüba sülen ashi.

Political party temi candidate

tenung agütsüba anogo tatemleni aruba mapang iba osang ya sangdonga liasü. Candidate temi Hombarnü 9:00 ako (GMT) tashinung tenung agientsü mesüra melenshitsu mela liasü.

Duterte ya tir atema tanaben tokteptsü metemsü, saka pai danga menden atema tokteptsü akok. Philippines nung tir aser tatong tir ya yimya balala nung shimteter.

Duterte'er jala arishi küm 43 tain Sara yagi pa melena tir atema tokteptsü imla liasü, kechiaser la ya kanga nungtugu aser taküm opinion polls ajunga nung la temaba jenjang nung liasü.

Duterte-Carpio-i linük tatong tir asoshi tokteptsü telemteba agiba yagi aika süngmang, kechiaser küm tepiyong opinion polls nung la jenjang tajungba liasü.

Tang tashi Duterte-Carpio ya shiba den külemi tokteptsü, ajibo mejangja. La tenüng ya teshimtet ketdangsür kati agütsür mapang tatsüka tsungta Ferdinand Marcos Jr indang political party ajanga Duterte-Carpio ya par telok nungi tatong tir südaktsütsü sangdong.

Kim Jong Un-i 'model' yimti semdang

Seoul, Yimpoksüi/November 16 (Agencies): North Korea lenir Kim Jong Un-i, China arrtsü nung yanglua aliba yimti tasen ka semdangogo. Pai ashiba agi, alima kin balalai parnok sentoker nongshia aliba mapang linük temulungtetba tulu aliba iba yimti ajanga sayur. Ita ka dak tema sülen pa tang mezüngbuba yimjak nung nokdakogo.

Korean Central News Agency-i Mongolbarnü ashiba agi, Samjiyon yimti semdangba mapang inyakyim balala dak temulung asüba Kim Jong Un-i lemsatepogo, koba dang pai "sacred place of the sun" ta ajar. KCNA-i, Kim-i yimti semdangba mapang kisü jensü tatembangbuba jenjang asadanga liasü, ta ashi.

Samjiyon yimti ya shishilembadak tongtibang yimti ka kümdaktsüogo, koba dang ketdangsürtemi "socialist utopia" ta ajar. Iba yimti nung

apartments, hotels, ski resort ka aser commercial, cultural aser medical facility tem amenoktsü.

Samjiyon yimti ya Mount Paektu anasa lir aser Kim'er kinungertem iba tesem nung jakzüük. Pai 2018 küm nungi iba tesem aiben semdanga arudar.

Samjiyon "model cultured city" ka küma melenshiba ya North Korea atema mapa tongtibangtiba ka liasü aser ruling party kümteter küm 75 ajungba mapang tembanga inyaknüa liasü. Ajisüaka coronavirus wara poktetba aser Kim indang nuclear weapon aser missile program tem dak sendakba nung alima kin balalai tenokdangba balala agütsüba ajanga tetsükdaktsü adoka liasü.

Kim-i iba yimti semdangba indang anogo tejangja magütsü, ajisüaka pai anogo 35buba nung tang mezüngbuba yimjak nung shilem agiogo. Pai tatema October 11 nü arms exhibition ka nung o jembia liasü.

CHILDLINE Kohima-i 'CHILDLINE se DOSTI Campaign 2021' mungogo



Kohima, Yimpoksüi/ November 16, 2021 (TYO):

Linük tesem ajunga nung tanga CHILDLINE partner den külemi CHILDLINE Kohima-i November 09, 2021 nungi tenzüka November 16, 2021 tashi 'CHILDLINE' küm 25 ajungba Silver Jubilee benjongmung aser CHILDLINE se DOSTI Campaign mungogo, ta sangdong ajanga metetdaksü.

Timtem nung alir tanurtem yaritsü aser parnok kümzüka ayutsü aser asenok aliba tesem nung tanurtem tim masüba mapa/inyakyim nungi kümzüka yutsütsüsa CHILDLINE mapatong nung yaritsü atema tain aser lanur tem dang metetta lidaktsütsü nükjiong nung iba campaign ayongzüka liasü.

Iba campaign shilem ama CHILDLINE Kohima-i sentong balala achaayanga agiogo. Campaign tenzüka, CHILDLINE office compound jara nung rong anü (wall painting) aser CHILDLINE office nung 'Child friendly room' yanglutsü atema tanur den apet noksa aser olen tem inokogo.

CHILDLINE 1098 services, child rights aser child protection acts nung tekümdangtsü sangdongtsü atema Photo booth ka amenok. Member Secretary

Nagaland Legal Services Authority aser SDO (Civil) Tseminyu indang Staff ajanga 'Dosti' tenangzüktep achaayanga agia liasü aser Tseminyu nung, Kohima District Legal Services Authority ajanga ayongba Mega legal camp nung Dosti band inoktsüba, signature campaign aser CHILDLINE photo booth amenokja liasü.

Executive Members of All Nagaland Taxi Association aser Line Master - Local Taxi Kohima den awareness sentong ka ayongzük aser parnok teka nung Dosti band mesülöksü. Ano, Local Taxi, Kohima den 'car sticker's campaign' ayongzüka liasü.

Christ King Catechism Children den awareness program den Children's Day munga liasü. Iba sentong agiba mapang, CHILDLINE 1098 services, Child Rights, Child Protection Acts, Dosti pledge, 'Good and Bad touch' tesayuba, CHILDLINE photo booth amenokba tem achaayanga agiogo aser tanurtem atema toll-free no. 1098 indang metetdaksü.

Pfuchama village nunga awareness program ka agiogo. Iba sentong nung CHILDLINE 1098 services, Child Rights, Child Protection Acts indang metetdaksü, teka junga

metsüktsü sayu, tejak nembangba mask inokba aser 'Good and Bad touch' indang tongtibangtem metetdaksü.

Kasa sentong nung tanurtem atema tetsüing nung balloon alenoker poktepba, kentenba, Dosti pledge aser Dosti band mesülöksüba den Signature Campaign ayongzükja liasü.

Maneni, hopta ka piyong ayongba campaign tembanga, nüburtem dang tekümdangtsü osang sangoktsütsü aser parnok nem ngudaktsütsü atema CHILDLINE Kohima-i Assam Rifle Camp D. Block indang jara (retaining wall) nung CHILDLINE 1098 services indang noksa yanglutsü. CHILDLINE Kohima-isa Colonel ADM (North) nem souvenir ka agütsü aser Dosti band ka mesülökja liasü.

CHILDLINE se DOSTI Campaign den amalitepa inyakba aser iba sentong takok ngua agitsü asoshi nungitta yariba atema CHILDLINE-i All Nagaland Taxi Association, Kohima District Legal Services Authority, Pfuchama village council, Christ King Parish Catechism tesayur aser Assam Rifle (North) dang pelaba metetdaksü, ta kasa sangdong nung shia lir.

Kashmir nung civilian ana...

(Tapak 7nungi...)

"Iba tatalokba aser nisung tepsetba dak sendakba nung tasüngdangba aika adoker.

"Taoba mapang teyazü nung nisung tepsetba ken o aika atalokogo aser tang #hyderporaencounter dak sendakba nung takaratiba nung telangzüba ka nüngdaker," ta pai tweet asü.

Civilian ana dak alia Srinagar kübok Hyderpora nung operation mapang kiralongrar asütsü ta temulung melemi bilemer ana tepsetogo. Police-i ashiba agi, kiralongrartem ya shopping complex nung Gul-i mekazükba takdang ka nung atsüka liasü. Inspector-General of Police, Kashmir, Vijay Kumar-i, kiralongrar anarongnung ka Bilal Bhai ta jangjaogo, ta ashi, shiba Pakistan nungi asütsü ta bilemer. Kiralongrar tanabuba ya Jammu kübok Ramban tesem nungi liasü aser pa maitsü jangjatsü atema par kinungertem jaokogo. Kasa mapang nung Peoples'

Alliance for Gupkar Declaration otongdar aser CPI (M) lenir tejen MY Tarigami-i, civilian ana tepsetba bushisüngdangtsü akhangba den ketdangsurtem dang tasümgang ana ya parnok kinungertem nem agütsütsü mepeshia asüngdangogo.

"Yashi Hyderpora nung tesasatsü lendong ka atalokogo, kong civilian ana taküm samaogo. Onok tang tensa

tamajung ka ajanga aoba mapang lir. Tang kechi otsü atoktsü aser sorkari kechi telangzüba ka agütsütsü? Parnok kinungertemi parnok aibelena mali ta shidar," ta pai ashi.

"Ochi obendang asoshi onoki judicial inquiry ka akhanger. Asürtem shia marutsü saka kinungertemi kechi atalok ajibo jangjatsü," ta paisa ashi.

TATAR MENDEN CHANGTONGYA KOSASANGER PUTU

(CHANGTONGYA VILLAGE COUNCIL)

P.O - Changtongya-798613 : Mokokchung ; Nagaland
Email id: changtongyakosasangputu@gmail.com

SANGDONGER

CHANGTONGYA KOSASANGER PUTU MENDEN nungi nübur ajak dangi yamai sangdonger. Shri. S.T. YAPANG LKR (Kohima) pai TIR YIMYIM osangkaket 10th November 2021 adok Olemsabang nung koba onük, "ABAM SANEN LUDEN TEMENEN AGI KANGBANGER LIR, TEMIEMAGI KÜMZÜKANG" iba onük nung zülua akaba ajak pai pa kija bilemba nung züluba iba ochet züluba nung CHANGTONGYA dak sendakba lokti tetet shinga shilem mali. Iba ONÜK züluba atema Changtongya yimden den S.T. Yapang Lkr ken o metembang anendaka lir.

CHANGTONGYA YIMDEN tenüng nung;

Sd/-
Shri. Tiasunep Lkr
Chairman

Sd/-
Shri. T. Imo Jamir
Secretary

PELABA LEMSATEPER

Onoki teti meima alila Ojala **Tarepyangla Jamir** (Mopungchuket) iba akümüli toktsür orr onok mangyimba mapang kija, kibong, Arogo aser lokti balala shirnokisa nübo, rongsen aser sarasadem agi onok den yaritepogo nenok dang onok kinungertemi kanga pelaba lemsateper.

Talisa la akümüli mapang nung kidang, kiyonger shirnokisa mapang ajak nung la den yaritepa aruogo, nenok dang alakteta pelaba lemsateper. Tsüngremi nenok ajak moajangma.

~ Temeim Kinungbo, Chirnur,
Semchirtem aser
Kinungertem.



ASO : 03/08/1959
ASÜ : 02/11/2021

JANGPETKONG SENSO TELONGJEM DIMAPUR

GOLDEN JUBILEE MUNG
SENTONG



Anogo | Mapang
NOV. 19, 2021 | 10:00 AM

Tesentepdak **SAKUS MISSION COLLEGE**
Landmark Colony Dimapur.

Benjong **DR. & MRS. LONGRINEKEN**
Yimpoksür Hon'ble MLA & Advisor, National Highways,
Treasuries & Accounts, Nagaland.

Omen | Tongti O Jembir
"TWANGWANG" | **DR. WALUNIR**

SENTONG

- Menden: Jangpetkong Senso Telongjem Dimapur Ketdangpurtem
- Jubilee Compere: Kr. Kilentula Jamir & Wb. M. Limasünep Imchen
- Jubilee Lapokba: Molungyimsen Students' Union, Dimapur

- | | |
|-----------------------------|---|
| 1. Lai zünga sarasademtsü | : Rev. Yapang Walling |
| 2. Pela-a agizükba | : Wb. Aoyanger Imchen, Tir JSTD |
| 3. JSTD Anthem | : Dimapur Jangpetkongtsür Telongjem |
| 4. Tayongzükba o | : Wb. I. Bendangliba, (Retd.) Director, Industries & Commerce, Govt. of Nagaland |
| 5. Jubilee Nüngo Kaket saya | : Wb. K.T. Wapang, Chief Electrical Inspector (Retd.) |
| 6. Tepela o | : i) Tir, Jangpetkong Senso Mungdang ii) Tir, Ao Senso Telongjem Dimapur iii) Wb. Moatoshi Longkümer, MLA |
| 7. Temeja ken | : Samaro |
| 8. Tetushi agütsüba mapang | : Wb. I. Anungba Sanglir |
| 9. Yimpoksür o | : Dr. Longrineken, Hon'ble MLA & Advisor, National Highways, Treasuries & Accounts, Nagaland |
| 10. Tongti o jembir | : Dr. Walunir Omen: "Twangwang" |
| 11. Jubilee Planning osang | : Wb. Imtiakum Pongen, Convenor, Jubilee Planning Committee |
| 12. Jubilee Resolution | : Convenor, Jubilee Resolution Committee |
| 13. Melepzüng o | : Wb. Zulu Ozüküm, Executive Committee, JSTD |
| 14. Tatem sarasadem | : Rev. O. Alem |

ALI AYOKER

Nihokhu yim (Sub-Division) anasa Newland nung highway nungi gari nung minute 5 jajashi pilar ali tayoktsü lir. Ali tesazük, Pura 20 (Lepzüka ayoktsü akok) Sq.ft. nung senpak Rs. 17/- (Negotiable) (Only Genuine Customer)

Contact No. 8415088061 / 9436078091

LONGRO PAVERS AND TILES ENTERPRISE

Aoyimti 2½ Mile, Lane-5, Dimapur



Phone No: 8837099673 / 9774871396

Northeast Technical Officials Workshop & Examination tenzükogo



Kohima, Yimpoksüi/November 16, 2021 (TYO): Mongolbarnü, Athletics Federation of India (AFI) akhüm kübok mezüing sentong - Northeast Technical Officials Workshop & Examination tenzükogo. Iba Workshop nung shisalen sayur temji AFI indang Technical Committee Chairman aser Telangana Athletics Association, President, Stanley Jones aser Kolkata nungi AFI Technical resource person, Shambudas na asütsü, ta sangdong ajanga metetdaksü.

Iba workshop lapokba sentong nung, Vice President, AFI, Abu Metha-i shisalen sayur pelashishia agizük aser; Nagaland aser North East nung Athletics ajungkettsütsü asoshi asalentong balala yangluba

atema pai AFI dang pelaba metetdaksü.

Metha-i, Technical Officials dang iba sentong ya maongka tulu ama agitsü aser national den international asayamung tem tajungtiba nung ketdang asütsü asoshi tejangraba tulu yur inyaksü ajungshia liasü.

Nagaland Cross Country Championships, Hornbill Cross Country, 56buba Nationals aser South Asian Championships densema Nagaland nung aruya aliba asayamung balala indang pai metetdaksü.

Metha-isa, North East nung sempet tajung alir asayartem jenti aliba AFI ajanga asadantetogo aser iba tesem nung saisapong ajungkettsütsü asoshi iba tentet ajanga asalentong balala achaayangdar, ta ashi.

Northeast nung sempet tajung alir lanurtem nem maongka agütsütsü nukjidong yur AFI-i inyaker, ta Metha-i metetdaksü.

Iba sentong nung Stanley Jones-i jembiba mapang, AFI-i Nagaland aser North East nung saisapong ajungkettsütsü tebilemba lir, ta ashi.

Stanley-i ashiba agi, national aser international asayamung ajunga nung technical official tem shilem ya kanga dang tongtumbang aser Nagaland nungi Technical Officials temi saisapong sabang temaba jenjang tongteta inyaksü imlar.

Iba 'workshop cum examination' ya anogo asem tashi agitsü aser Nagaland Cross Country Championships den tembangtsü, ta kasa sangdong nung shia lir.

18buba Nagaland Inter District volleyball tournament atema Kohima team sangdongogo

Kohima, Yimpoksüi/November 16, 2021 (TYO): Aruya aliba '18th Nagaland Inter District volleyball tournament 2021' atema, Kohima district tenüing nungi shilem agitsü asoshi Kohima District Volleyball Association (KDVA)-i asayar 19 shimogo.

Iba volleyball asayamung ya November 24 nungi 26, 2021 tashi Indira Gandhi Stadium, Kohima nung asayatsü, ta sangdong ajanga metetdaksü.

18buba Nagaland Inter District volleyball tournament atema Kohima team yamai alitsü:

Tebur Team: Kethovikho, Menuoselie, Menuokho-o, Ato Chitso, Vimechozo, Vikehiezo, Keneiso, Asakho, Kevirielie aser Lhouvizolie.

Tetsür Team: Mhasivino, Rinrichon, Nounenuo, Grace Kent, Beveinai, Chorichon, Avini, Khavili aser Mesavino.

2022 T20 World Cup atema tesem tenet jangjaogo: ICC

Yimpoksüi/November 16, 2021 (Agencies): Sangküm Australia nung 2022 T20 World Cup asayamung ta tesem tenet nung asayatsü, ta Mongolbarnü International Cricket Council (ICC) sangdong ajanga jangjatsüogo.

Super 12 nung jenjang ka ngutetsü atema Sri Lanka aser West Indies na asayatsüsa akümer.

T20 World Cup, koba 2020 küm Australia mesüra New Zealand nung asayatsü renem, saka coronavirus wara süshia maoba ajanga küm ana shi mapang atsülangja liasü, iba asayamung sangküm October 16 aser November 13 tsüingda asayatsü.

Adelaide, Brisbane, Geelong, Hobart, Melbourne, Perth aser Sydney nung match 45 asayatsü aser iba asayamung final ya aonung Melbourne Cricket Ground nung asayatsü.

Sydney aser Adelaide nung semi-final asayatsü.

"Iba asayamung nung asayatsü atema team 12 tashi jangjaogo aser parnok den tanga team adentsü asoshi qualification inyakyim yongya atar," ta Head of Events, Chris Tetley-i ashi.

"ICC asayamung tanaben Australia nung ayongzüktsü asoshi onoki yongyar aser ICC Men's T20 World Cup 2022 atema yimti tentet pelashishia sangdonger. 2020 küm ICC Women's T20 World Cup takok ngua ayongba aser küm ana tashi iba asayamung thinena arur sülen, sangküm 2022 asayamung atema Local Organising Committee den longjemer asalentongtem yanglutsü nukjidong lir," ta Chris-i ashi.

Deobarnü, Dubai nung wicket 8 agi New Zealand tsükdaksüba sülen, tayonger team Australia-i tanaben iba title

atema tokteptsü. Afghanistan, Bangladesh, England, India, Pakistan aser South Africa team den taküm T20 World Cup finalist Australia aser New Zealand naprongla Super 12 stage atema qualify süogo. Temaba team rongnung item team asütsü.

Sangküm 2022 February ita Oman nung aser June-July, 2022 tsüingda Zimbabwe nung Sri Lanka aser West Indies nati Namibia den preliminary round asayatsü. Scotland aser tanga linük pezü qualifying asayamung ana nungi shimtsü.

Taoba mapang Australia-i Men's Twenty20 World Cup khen danga ayonga mali, saka MCG nung 50-overs World Cup final anaben tashi asayadanga lir. 2015 küm MCG kübok ayongba World Cup final nung terepranger 93,013 matsüingdang Australia-i New Zealand tsükdaksü.

ICC 'Team of Tournament' nung India nung ka danga mali

Dubai, Yimpoksüi/November 16 (Agencies): ICC indang T20 World Cup 'Team of the Tournament' nung India nung asayar ka danga züingoksema mali. Iba team nung Sri Lanka aser South Africa na densema linük trok nungi asayartem züingoksema lir. Team captain asütsü Pakistan nung asayar Babar Azam shimogo.

Taküm World Cup nung Pakistan aser New Zealand na makokba sülen India group league stage nung tsükadok. Parnoki Afghanistan, Scotland aser Namibia bo kokogo.

Asayar shimertemi iba team nung shimoktsü atema India nung asayar ka danga temsüa mali ta bilemer. Kasa mapang nung semi-finals atema qualify mesüaka South Africa nung asayar Aiden Markram aser Anrich Nortje aser Sri Lanka nungi asayar Charith Asalanka aser Wanindu Hasaranga na ICC team nung züingoksema.

Asayamung akokba Australia team, runners-up New Zealand, semi-finalists England aser Pakistan nungi nungtugu asayartem iba team nung züingoksema.

Opening batter aser 'Player of the Tournament' David Warner, leg-spinner Adam Zampa aser seamer Josh Hazlewood nungeri team takok dangi aniba sülen parnok Australia nung

asayartem rongnungi iba team nung züingoksema.

Maneni England nungi asayar Jos Buttler wicketkeeper ama aser New Zealand left-armer Trent Boult, Pakistan nungi asayar Babar (captain) aser Sri Lanka nungi asayar Hasaranga nung iba list nung shima lir. Hasaranga ya iba asayamung nung wicket timba agiba asayar liasü.

Asayar shimba telok nungi taoba mapang West Indies nung pacer Ian Bishop-i, "team mashika shimba mapang ama tebilemba balala alitsü aser team nung asayartem tatembang ka kuma shimtsü asoshi sütepa sensaksemtsü.

"Panel-i ibaji akhümtsübur aser onoki iba dak sendakba nung süoki ia sensak asemtsü ajungshir. Iba team shimtsü ya kanga tasak liasü. Asayartem ya Super 12 nung final tashi nung asayaba yimya repranger shimogo," ta ashi.

Asayartem yamai alitsü:

David Warner (Australia)
Jos Buttler (wk) (England)
Babar Azam (captain, Pakistan)
Charith Asalanka (Sri Lanka)
Aiden Markram (South Africa)
Moeen Ali (England)
Wanindu Hasaranga (Sri Lanka)
Adam Zampa (Australia)
Josh Hazlewood (Australia)
Trent Boult (New Zealand)
Anrich Nortje (South Africa)
12th: Shaheen Afridi (Pakistan)

Indonesia Masters: Sindhu aser Lakshya na tanabuba round-i iogo

Bali, Yimpoksüi/November 16, 2021 (Agencies): Mongolbarnü Indonesia Masters Super 750 badminton asayamung nung anaben Olympic medal angur PV Sindhu aser külem India nung Lakshya Sen nati pei pei tata asaya takok ngua tanabuba round-i iogo.

Tetsür kija asaya nung World champion aser seed tasembuba Sindhu-i Thailand tsür Supanida Katethong madak 21-15, 21-19 agi takok angu. Iba asaya minute 43 nung tembang.

Tanabuba round nung Sindhu-i Spain tsür Clara Azurmendi den asayatsü.

Kasa asayamung tebur kija asaya nung, Lakshya-i world no 10 Japan nung Kanta Tsuneyama madak takok nguogo. Almora nungi arishi küm 20 tain Lakshya, shibai Hylo Open Super 500 semifinals aser Dutch Open final tongteta asaya, pai 21-17, 18-21, 21-17 agi Kanta tsükdaksü.

Lakshya-i tanabuba round nung top seed aser anaben world champion Japan nung Kento Momota den asayatsü.

Sindhu-i mezüing game nung Supanida den timtem kecha meli asaya liasü aser lai point 11-5 agi Supanida ajateta asaya.

Tanabuba game nung, Supanida-i toktepa asayatsü

tenzük. Iba game nung Sindhu 11-8 agi Supanida tejakdang ser asaya, saka Supanida-i Sindhu nem point mengudaktsütsü asoshi meranga asaya.

Tena tsüingda point 19-18 aliba mapang, Sindhu-i match point ana angu. Sindhu-i tanabuba set akoktsü lia Supanida-ia point ka ngutet.

Tebur kija asaya nung, World no. 19 Lakshya-i maneni shilem tajung agia arudar aser mezüing round nung pa dang nungi temaba jenjang nung alir ka tsükdaksü.

Mezüing game nung Lakshya 6-9 agi Kanta tesülen ser asaya tenzük, saka pai 13-11 agi Japan nung Kanta ajatet aser 14-13 nungi pai point pezü tashi atonga angu.

Tanabuba game nung, Lakshya 4-0 agi tejakdang ser asaya, saka Kanta-i 10-8 agi Lakshya ajateta asaya. Point 14-14 nungi Kanta-i Lakshya nem maongka magütsü asaya aser iba game koktet.

Decider nung, Lakshya-i süngjema asaya tenzük, kong 3-6 nungi pai 13-8 agi Kanta ajateta asaya. Iba mapang pai point trok tashi atonga angu. Ano tenaprongla point 16-16 küm adok saka tanabuba round tongtetsü atema Lakshya-i point 5 tashi ngutet.

BILEMDANGANG

"Mangutsüba sempettem masü yuja akaba sempettem bushitetang."